

Ibraawe Asaas **Xaafetida Kiita** **Gaatha Qofa**

Ha kiitay xaafetiday, wolqaama metoy gakin, banta ammanuwa agganaw matida ammaniya asaasa. Ha maxaafa xaafey, Yesuus Kiristoosi wursethinne tuma Xoossa qoncethi gideysa Ibraawe asaas bessees. Ammaniya asay banta ammanuwan minnana mela enta minthethees. I hessan heedzu ayfe qofata qoncisidi bessees.

1. Yesuusi ba ekida metuwan Aawas tuma kiitetida merina Xoossa Na7a. I Xoossa Na7a gidida gisho, Gal7a Caaquwa wode de7iya na-betape, kiitanchotapenne Musepe bolla.

2. Yesuusi Gal7a Caaquwa kahinetape daro aadhiya merina kahine gideysa Xoossay ba hu-uphen markatis.

3. Yesuusa baggara ammaniya asi nagarape, yashafenne hayqope attees. Yesuusi kahine halaqa gideysada, kase Ibraaweta ammano woganinne mehe yarshon kuyada bentiya atosetha oosuwa ha77i tuma oothis.

Xaafey Isra7eele asa taariken daro eretida asaa ammano leemiso oothi ekidi (Shem 11) ha maxaafa nabbabiya asay banta ammanuwan minnana mela akeekisees. Hessadaka, shempo 12 nabbabiya asay banta ayfiya Yesuusa bolla wothidi, banta ammanuwan minnana melanne ay metoyenne waayey gakikoka, gencana mela zorees. Wursethan zoreninne akeekiso qaalan ba kiita kuuyees.

Maxaafa Ayfe Qofata

Xoossay Kiristoosa baggara qoncis (1:1-4)
Kiristoosi kiitanchotape bolla (1:4–2:18)
Kiristoosi Musepenne Iyyasupe bolla (3:1–4:13)
Kiristoosa kahinetethay bolla (4:14–7:28)
Kiristoosa caaqoy bolla (8:1–9:22)
Kiristoosa yarshoy bolla (9:23–10:39)
Ammano bayratethi (11:1–12:29)
Xoosse ufaysiya de7o (13:1-19)
Akeekisonne zore (13:20-25)

Na7ay Kiitanchotape Bolla

¹ Kase Xoossay, nu aawatas nabeta baggara dumma dumma ogen daro wode odis.

² Shin ha wursetha wodiyan ubbaa iya laatisida qassi alame iya baggara medhida ba Na7aa baggara nuus odis.

³ Na7ay Xoossaa bonchuwa phoolethaanne kumetha Xoossa Xoossatetha ekidi, ba wolqaama qaalaa ha alamiya katisidi oykis. Asaa enta nagaraape geeshidaape guye Ubbaafe Bolla Xoossaa ushacha baggan saluwan uttis.

⁴ Iyaw imetida sunthay kiitanchota sunthafe bolla gideysada I entafe bolla.

⁵ Hiza, Xoossay kiitanchotape oodeko,

“Neeni ta Na7a;

ta hachi new aawa gidas” gidee?

Woyko qassi oodeko,

“Taani iyaw aawa gidana;

ika taw na7a gidana” gidee?

⁶ Qassi Xoossay ba bayra Na7aa ha alamiya kiit-tishe,

“Xoossaa kiitanchoti ubbay iyaw goyinno”
yaagis.

⁷ Xoossay kiitanchotaba odishe,
“Xoossay ba Kiitanchota carko,
ba aylleta tama laco oothees”
yaagees.

⁸ Shin ba Na7aba odishe,
“Xoossaw, ne araata merinaw de7ees.
Ne kawotethaa ne xillotethan aysaasa.

⁹ Neeni xillotethi dosadasa; iita ixadasa.
Xoossay, ne Goday, nena ne laggetape aathidi
dooris,

ufaysa zayte* nena tiyis”
yaagees.

¹⁰ Xoossay Zaaridi,
“Godaw, koyro neeni sa7a medhadasa;
saloti ne kushe ooso.

¹¹ Hessati ubbay dhayana;
shin neeni daana.
Enti ubbay afilada wurana.

¹² Neeni enta saleenada xaaxana;
qassi enti afilada laametana.

Shin neeni ubba wode nena;
ne laythayka wurenna”
yaagees.

¹³ Shin Xoossay kiitanchotape oodeko,
“Taani ne morketa ne tohoy
yedhiyaso oothana gakanaw,

1:6 Zaare 32:43. **1:7** Maz 104:4. **1:8** Maz 45:6-7. * **1:9**
Ufaysa zayte: I kawotiya wode asay ufaysan ililidi iya kawotheysa
bessees. **1:10** Maz 102:25-27.

haysan taape ushacha baggan utta” gidee?

¹⁴ Kiitanchoti ubbay atotethi demmanaw de7iya asata maaddanaw Xoossay kiitida ayyaanata gidokonaayee?

2

Gita Anjo

¹ Hessa gisho, nuuni si7ida tumaape haraso eketonna mela he si7idaysa minthidi naaganaw bessees.

² Hiza, kiitanchota baggara odetida qaalay tuma gidiko, iya naaqoyenne kiitetonna ixoy pirda ehiyaba gidiko,

³ yaatin, nuuni haysa mela gita atotetha ixas giiko, waanidi attanee? Koyro Goday ba huuphen he atotetha odis; qassi iyape si7idaysati nuus geeshshidi markatidosona.

⁴ Qassi Xoossay malaatatan, oorathabatan, dumma dumma mallataninne ba sheniyada immida Geeshsha Ayyaana imotatan markatethaa minthis.

Yesuusi Ase Gidis

⁵ Xoossay ha nuuni odiya sinthafe yaana alamiya, kiitanchotas haarisibeenna.

⁶ Geeshsha Maxaafay issi bessan haysada yaagees:

“Neeni asas qopanaw asi aybee?

Woyko neeni iya naaganaw I aybee?

⁷ Ne iya kiitanchotape guutha wodes guuthadasa; Iya huuphen bonchonne saba kallacha wothadasa.

⁸ Qassi ubbaba iya tohuwape garsan wothadasa” yaagees. Xoossay ubbaba iyaw haarisiya wode iyaw haaretiboonabay aybika baawa. Shin ha77i ubbabay iyaw haaretishin nuuni be7ibooko.

⁹ Shin nuuni kiitanchotape guuthara guuxida Yesuusa be7oos. Xoossaa aadho keehatetha gaason Yesuusi asa ubbaas hayqis. I waaye hayqo hayqida gisho, bonchonne saba kallacha iya huuphen wothis.

¹⁰ Ubbabay iyawunne iya gaason medhetida Xoossay, daro nayta baara bonchisanaw enta atotetha huuphiya, Yesuusa waayen polo oothanaw iyaw bessees.

¹¹ Yesuusinne he I geeshshida asa ubbay issi aawa nayta. Yesuusi enta, “Ta ishata” gidi xee-ganaw yeellatonnay hessasa.

¹² Yesuusi,

“Taani ne sunthaa ta ishata awaajana;
deriya shiiquwan nena galatana”
yaagees.

¹³ Qassi I, “Taani ta ammanuwa iya bolla wothana” Qassika, “Xoossay taw immida naytara ta haysan de7ayis” yaagees.

¹⁴ Nayti ashoyenne suuthi de7eyisata gidiya gisho, Yesuusika entada ase gidis. I hessa oothiday, hayqo bolla wolqi de7iya Xalahiya ba hayquwan dhaysanaasa.

¹⁵ Qassi banta de7o laytha ubban hayqo yashshan aylletidi de7eyisata aylletethaafe wozanaasa.

¹⁶ Tuma Yesuusi yiday Abrahaame koche maaddanaasafe attishin, kiitanchota maaddanaasa gidenna.

¹⁷ Asaa nagaray atto geetetana mela Xoossaa sinthan maariyanne ammanetida kahine halaqa gidis. Hessa gisho, I ubbaban ba ishata daananaw bessees.

¹⁸ I ba huuphen paacen waayetida gisho paaceteyisata maaddanaw danda7ees.

3

Yesuusi Musepe Bolla

¹ Hessa gisho, Xoossay xeevida geeshsha ishato, nu ammanon Godaa gidi xeeqiya hawaariyanne kahine halaqaa Yesuusa be7ite.

² Musey Xoossaa Keetha ubban ammanetidaysada Yesuusika bana doorida Xoossaas ammanetidaysa.

³ Keethe keexeysi keethafe aadhidi boncheteysada Yesuusi Musepe aadhiya boncho ekanaw bessees.

⁴ Issi issi keethaa keexida asi de7ees, shin ubbaa giigisiday Xoossaa.

⁵ Musey Xoossaa Keetha ubban ammanetida ayye gididi, Xoossay sinthafe gaanabas marka gidis.

⁶ Shin Kiristoosi xoossa keethan na7ada ammanetidaysa. Nuuni ekana gidi naagiya ufaysaa minthidi naagiko Xoossaa keethi gidoos.

Xoossa Asas De7iya Shempo

⁷ Hessa gisho, Geeshsha Ayyaanay geysada, “Hachi hinte Xoossay geysa si7iya wode,

- ⁸ mela biittan paaciya gallas,
hinte aawati makallidaysada,
hinte wozanaa minthofite.
- ⁹ Hinte aawati tana paacidosona;
oytamu laythi ta oosuwa be7idosona.
- ¹⁰ Hessa gisho, ta he yeletethaa hanqetada,
‘Enti ubba wode banta wozanan baloosona;
ta ogiya eribookona’ yaagas.
- ¹¹ Hessa gisho, taani ta hanquwan caaqada,
‘Ta shempo bessaa ubbaka gelokona’ yaagas”
yaagees.
- ¹² Ta ishato, hintefe oodenka, de7o Xoossaafe
hintena shaakiya iitanne ammanonna wozani
doonna mela naagetite.
- ¹³ Hintefe oonaka nagari balethin, ba wozanaa
minthonna mela “Hachi” yaagetidi xeegetishin
gallas gallas issoy issuwara zoretite.
- ¹⁴ Nu koyro ammanuwa nuuni wursethi
gakanaw minthidi naagiko, Kiristoosara issife
laattana.
- ¹⁵ Geeshsha Maxaafan,
“Hachi Xoossay geysa hinte si7iya wode,
he wode enti makallatethan hanidaysada,
hinte wozanaa minthofite”
yaagis.
- ¹⁶ Xoossay giyaba si7idi makalliday oonee?
Musey Gibxefe kaalethe kessida ubbaa gidokon-
aayee?
- ¹⁷ Xoossay oytamu laythi oona hanqetidee?
Nagara oothidaysatanne enta ahay mela biittan
wodhi attida asata gidokonaayee?

¹⁸ Qassi Xoossay, “Ta shempo bessaa geleketa” yaagidi caaqiday, iyaw kiitetonna ixida asaape attishin, oodesee?

¹⁹ Hiza, enti he shempo bessaa gelonna attiday ammanibona gisho, gideysa nu be7oos.

4

¹ Hiza, Xoossay nuna ba shempo bessaa gelsana gida qaalay buroo sinthafe de7iya gisho, hintefe oonika he shempo bessaa gelonna attonna mela naagetoos.

² Entaw Wongelay sabbaketidaysada, nuuska sabbaketis. Shin enti si7idaba ammanidi eki-boonna gisho enta go77ibeenna.

³ Gidoshin, alamey medhetoosape doomidi Xoossaa oosoy poletidaysa gidikoka, Xoossay, “Taani ta hanquwan caaqada,

ta shempo bessaa ubbaka gelokona” gidaysada, nuuni ammanidaysati iya shempo bessaa gelana.

⁴ Laapuntha gallasaaba issi bessan, “Xoossay laapuntha gallasan ba ooso ubbaafe shempis” yaagis.

⁵ Qassika he bessan, “Enti ta shempo bessaa ubbaraka gelokona” yaagis.

⁶ Koyro Wongela si7idaysati kiitetonna ixidi shempo bessaa gelibookona. Yaaniya gisho, ha77ika he shempo bessaa gelana issi issi asati de7oosona.

⁷ Hessa gisho, Xoossay, “Hachi” gidi xeegishe issi gallas nuus qanxis. Daro wodepe guye Xoossay Dawita baggara,

“Xoossay giyaba hachi hinte si7iya wode,
hinte wozanaa minthofite”
yaagidi odis.

⁸ Iyyasuy entaw shempuwa immidaba gidiyako,
Xoossay hara gallasaba guyepe odennashin.

⁹ Hiza, Xoossaa asaas Sambaata shempoy naage-
tidi de7ees.

¹⁰ Xoossaa shempo bessaa geliya oonika, Xoossay
ba oosuwape shempidaysada ika ba oosuwape
shempana.

¹¹ Hessa gisho, oonika he asaa kiitetetha ixuwa
kaallidi, kundonaada Xoossaa shempo bessaa
gelanaw minnoos.

¹² Xoossaa qaalay de7onne ootheysa. Nam7u
baggara qaratida mashshafeka aadhidi oco. I
shempo, ayyaana, xaphonne kolize gakanaw kan-
thidi caddees. Qassi asa wozanan de7iya geem-
mida qofaanne amuwa shaakidi pirdees.

¹³ Xoossaa sinthafe qosetiyabay ayba med-
hetethika baawa. Iya ayfe sinthan ubbabay
qoncenne kallo de7ees. Nuuni zaaro immanaw
bessey iya sinthana.

Yesuusi Gita Kahine Halaqa

¹⁴ Hiza, salo keyida gita kahine halaqay, Xoossaa
na7ay Yesuusi, nuus de7iya gisho, nu ammanuwa
minthidi naagoos.

¹⁵ Nu kahine halaqay nu daaburiya wode nuus
qadhetanaw danda7eysa. I nuuda ubbaban
paacetisipe attishin, nagara oothibeenna.

¹⁶ Hiza, maarotethaa ekanawunne maade
koshshiya wode aadho keehatetha demmanaw

aadho keehatethay de7iyasuwa Xoossaa araatako
yayyonna shiiqoos.

5

¹ Issi issi kahine halaqi asaa giddofe dooretidi,
Xoossara gathiyaban asaa gisho imotanne nagara
yarsho yarshanaw shuumetees.

² I ba huuphen daaburancho gidiya gisho, eron-
naysatasinne baleysatas qadhetanaw danda7ees.

³ I ba nagara gishonne asa ubbaa nagara gisho
yarsho yarshanaw bessey hessasa.

⁴ Oonika ha bonchuwa baw ekanaw
danda7enna, shin Aaroni kahine halaqa gidanaw
xeegidaysada Xoossan xeegetanaw bessees.

⁵ Hessadaka, Kiristoosi kahine halaqa gidiya
bonchuwa baw ekibeenna. Shin Xoossay iya,

“Neeni ta Na7a;
hachi ta new Aawa gidas”
yaagees.

⁶ Qassi harason,
“Malkexadeqi kahine gididaysada,
neeni merinaw kahine gidana”
yaagees.

⁷ Yesuusi ase gididi ha alamiyan de7iya wode
bana hayqope ashshanaw danda7iya Xoossaa
daro yeehoninne afuthan woosis. I, iya bonchidi
kiitetida gisho Xoossay iya woosa si7is.

⁸ Yesuusi Xoossaa Na7a gidikoka ba waayetida
waayan kiitetethi tamaris.

⁹ Hessanka, Yesuusi ba oosuwa polidaape guye baw kiitetiya ubbay merinaa atatetha demmana mela gaaso gidis.

¹⁰ Xoossay Malkexaadeqa shuumidaysada kahine halaqa oothidi iya shuumis.

Hinte Ammanuwan Daaburopite

¹¹ Ha nu oda bolla guji odanabay darobay de7ees, shin hinte akeekay guutha gidiya gisho hintew odi gelsanaw waaysees.

¹² Hinte hannooode astamaare gidanaw bessees, shin Xoossaa qaala koyro timirtiya hintena zaari tamaarsiya hara asi koshshees. Hinte mino kathi maanaw danda7onna gisho maathi koshshees.

¹³ Maathi paahetiya oonika yooga na7a gidiya gisho, lo77onne iita shaaki erenna.

¹⁴ Shin mino kathi lo77onne iita shaaki eriya kahaama asaasa.

6

¹ Hiza, Kiristoosaba tamaarsiya koyro timirtiya aggidi Kiristoosan kahaamatethako boos. Hayqo oosoop simobaanne Xoossaa ammanoba koyro timirtiyo guye simmoko.

² Hessadaka, xinqatetaba,* kushe wosobaa, hayqope dendobaanne merina pirdaba zaari tamaroko.

³ Xoossay giiko nu hessa oothana.

⁴ Issi toho poo7oy poo7idaysata, salo imota eki-daysata, Geeshsha Ayyaanan shaaketidaysata,

^{5:12} 2 Qoro 3:2. * ^{6:2} *Xinqatetaba*: Ha bessan xinqatetaba geetetiday duma duma geeshsho wogataba odanaasa.

⁵ lo77o Xoossaa qaalanne sinthafe yaana alamiya wolqaa be7idaysata,

⁶ guyepe kaddidaysata nagaraape nam7antho zaaranaw danda7etenna. Ayis giiko, enti banta dhayuwaa Xoossaa Na7aa zaari kaqiya mela masqaliya bolla iya kaqosonanne asa sinthan kawushoosona.

⁷ Ubba wode I bolla bukiya ira uyada, goyida uraa maaddiya kathi immiya biittiya Xoossan an-jetidaaro.

⁸ Shin agunthinne kinchote doliya biittiya aybibaaka maadduku; iw baadethay matatis; wursethan xuugetana.

⁹ Nu siiqo ishato, nuuni haysada odiyaba gidikoka, hintena atatethako kaaletthiya lo77obay hintew de7eysa eroos.

¹⁰ Xoossay suure pirdeysa. Xoossay, hinte ooth-ida oosuwanne kase gidin ha77ika ammaneyisata maaddidi, iyaw de7iya siiquwa bessidaysa dogenna.

¹¹ Hinte ubbay ufaysan naageysa demmana gakanaw ha minotethaa wursethi gakanaw besaana mela nu amottoos.

¹² Hinte ammanoninne danda7an naagiya ufaysaa laattiya asaa daanana melape attishin, azalla gidana mela koyoko.

Xoossa Ufaysa Qaalay Sidhisena

¹³ Xoossay Abrahaames immana gidi caaqida wode baape aadhiya hari giti bayna gisho ba huphen caaqis.

¹⁴ Iyako, “Taani nena anjana; ne zerethaaka darsana” yaagis.

¹⁵ Abrahaamey danda7an naagidi Xoossay immana gida ufaysaa ekis.

¹⁶ Asi caaqishe baape gitatiya uran caaqees; he caaqoy geetetidaba minthidi, palama ubbaa teqe.

¹⁷ Hessa gisho, Xoossay ba laametonna qofaa ufaysa qaala laatteysatas qoncisanaw koyida gisho caaqon minthis.

¹⁸ Xoossay wordotenna. Iya ufaysa qaalaynne caaqoy, nam7ayka laametokona. Ha nam7ubatan nu sinthan de7iya ufaysaa oykanaw danda7ana mela geshe demmanaw iyako baqatida nuuni, wolqaama minthetho demmana.

¹⁹ Ha ufaysay nu shempuwa, markabey qaaxonnaada minthi oykiya birata mela. He ufaysay magarajuwafe guye baggan de7iya geeshsha bessaa gelis.

²⁰ Yesuusi Malkexaadeqa shuumatethaada merinaw kahine halaga gididi, nu gisho nuupe sinthatidi he bessaa gelis.

7

Kahiniya Malkexaadeqa

¹ Malkexaadeqey, Saleema Kawoy, Ubbaafe Bolla Xoossaa kahine. He Malkexaadeqi Abrahaamey kawota oli xoonidi simmishin iyara gahe-tidi iya anjis.

² Abrahaamey ba di77idaba ubbaafe iyaw asraata kessidi immis. Malkexaadeqa sunthay koyro “Xillotethaa kawa”, nam7antho, “Saleema kawo” birshethayka “Sarotethaa kawa” guussu.

³ Malkexaadeqas aayiya woyko aawu woyko kocha paydoy baawa. Iya yeletethaas doomethi woyko iya de7uwas wursethi baawa, shin Xoos-saa Na7a daanidi merinaw kahine gidis.

⁴ Malkexaadeqi ay mela giteeko be7ite. Nu aawata mayzay, Abrahaamey, ba de77idabaape iyaw asraata immis.

⁵ Kahine gidiya Leewe kochay Isra7eele asape, hessika Abrahaame koche gidida banta ishatape asraata ekana mela higgey kiittees.

⁶ Malkexaadeqi Leewe koche gidonna ixikoka Abrahaamepe asraata ekis; ufaysa qaali de7iya Abrahaame anjis.

⁷ Guuthay gitan anjeteysi palanthenna.

⁸ Issi baggara, asraata ekeysati hayqiya asata, shin hara baggara asraata ekeysati de7on de7ees yaagidi odetidaysa.

⁹ Hiza, asraata ekiya Leewey, Abrahaame baggara asraata immis gaanaw danda7etees.

¹⁰ Ayis giiko, Malkexaadeqi Abrahaamera ga-hetiya wode Leewey yeletiboonnaba gidikoka, ba mayza Abrahaame gulbatan de7ees.

¹¹ Isra7eele asaas higgey Leewe kahinetetha baggara imetis. Ha Leewe kahinetethay polo gididaba gidiyako Aaronaysa mela gidonashin, Malkexaadeqa mela hara kahine shuumanaw ayis koshshidee?

¹² Hiza, kahineti laametiya wode higgeyka qassi laametanaw bessees.

¹³ Ha nu iyabaa odiya uray hara koche; iya sheeshape oonika yarsho bessan kahinetethan oothibeenna.

¹⁴ Nu Goday Yihuda sheeshape yidaysi ereti-daysa. Gidoshin, Musey kahineteba odishe Yihuda kochaaba aybaka odibeenna.

¹⁵ Malkexaadeqa mela hara kahiney yidaba gidiyako ha nu odiyabay aadhidi qoncana.

¹⁶ I kahine gididay dhayonna de7o wolqanaape attishin, ba mayzaa wogaaninne higger gidenna.

¹⁷ Geeshsha Maxaafay,
“Malkexaadeqa kahinetetha mela,
neeni merinaw kahine”
yaagidi markatees.

¹⁸ Koyro higgey daaburanchonne maaddonnaba gidiya gisho shaaretis.

¹⁹ Muse higgey aybinka polo oothanaw danda7ibeenna. Shin nuuni iya baggara Xoossaako shiiqiya ubbaafe aadhiya ufaysa qaalay nuus imetis.

²⁰ Kiristoosi kahine gidiya wode Xoossay caaqis, shin harati kahine gidida wode hessa mela caaqoy baawa.

²¹ Shin Yesuusi caaqon kahine gidis. Xoossay yaagidi caaqis;

“Goday caaqis; I ba qofaa laammenna;

‘Neeni merinaa kahine’ ”
yaagis.

²² Ha caaquwa gaason Yesuusi nuus ubbaafe aadhiya qaala caaquwas waase gidis.

²³ Kahinetethan oothonna mela hayqoy enta diggida gisho koyro kahineta tayboy daro.

²⁴ Shin Yesuusi merinaw de7iya gisho iya kahinetetha hari laattenna.

²⁵ Hessa gisho, I ubba wode enta gisho gaan-natanaw merinaw de7iya gisho Xoossaako iya baggara yeyisata polo ashshanaw danda7ees.

²⁶ Hiza, nuus koshshiyaba immiya, geeshshay, boreynne tuni baynaysi, nagaranchotape shaaketidaysinne saluwape aadhidi dhoqida kahine halaqay nuus koshshees.

²⁷ I hanko kahine halaqata mela koyro ba nagara gisho, kaallidi asaa nagaraa gisho gallas gallas yarsho yarshanaw koshshenna. I bana yarshida wode zaarethonna ogen issi toho bana yarshis.

²⁸ Muse higgey daaburancho asaa kahine halaqa oothidi shuumees. Shin higgiiyafe guye yida caaqo qaalay merinaw polo gidida Xoossaa Na7aa shuumis.

8

Yesuusi Nu Kahine Halaqa

¹ Nuuni haasaya gitabay hessa. Saluwan Ubaafe Bolla Xoossaa araatape ushacha baggan utida haysa mela kahine halaqay nuus de7ees.

² I asan gidonashin, Godan eqida tuma dunkaaniyan xoossa keethan oothees.

³ Kahine halaqa ubbay imonne yarsho yarshanaw shuumetees. Hessa gisho, ha kahiney yarshanaw issibay daanaw koshshees.

⁴ Higgey kiiteysada yarshiya kahineti de7iya gisho, Kiristoosi sa7an de7iyaba gidiyako I kahine gidenna.

⁵ Enti kahinetethan oothiya dunkaaney salon de7eysas leemisonne kuya. Musey dunkaaniya essiya wode Xoossay iyako, “Taani nena zumaa bolla bessida leemisuwa kaallada ootha” yaagis.

⁶ Shin Yesuusi giddo gididi sigethiya caaqoy, koyro caaquwape aadheysada I ekida oosoy entaysafe aadhees. Hessi eqiday aadhiya caaqo qaalana.

⁷ Koyro caaquwan bali baynaba gidiyako nam7antho caaqo koshshenna.

⁸ Shin Goday enta boridi, haysada yaagis:
“Taani Isra7eele asaaranne Yihuda asaara ooratha caaqo caaqiya wodey yaana.

⁹ He caaqoy ta enta aawata Gibxe biittafe kushiya oykada,

goocha kessida wode entara caaqida caaquwa mela gidenna.

Enti ta caaquwan ammanetibona gisho,
taani enta yegga aggas yaagees Goday.

¹⁰ Shin hizape guye Isra7eele asaara
ta caaqana caaqoy haysa yaagees Goday.

Taani ta higgsiya enta guuggiyan wothana;
enta wozanan xaafana.

Taani enta Xoossaa gidana;
entika ta ase gidana.

¹¹ Entafe oonika ba shooruwa woyko ba ishaa,
‘Godaa era’ yaagidi tamaarsenna.

Enti guuthafe gita gakanaw

ubbay tana erana.

¹² Taani enta naaquwa atto gaana;
enta nagaraa zaara qopike” yaagees.

¹³ Xoossay ha caaquwa “Oorathi” gidi xeegishe
koyroysa gal7isis. Hiza, gal7aynne ceegay
dhayiya wodey gakis.

9

Sa7a Xoossa Keethan De7iya Goyinno

¹ Koyro caaquwas Xoossaa goyinniya wogaynne
sa7a Xoossa Keethay de7ees.

² Dunkaaney eqis. Iyan xompe wothiya kocay,
xarphээaynne Godaa sinthan wothiya uythay
de7ees; he bessay Geeshsha Bessaa geetetees.

³ Nam7antho magarajuwafe guye baggara
de7iya bessay Ubbaafe Geeshsha Bessaa
geetetees.

⁴ Iya giddon ixaane cuyisiya worqa
saaxineynne worqan meeshetida caaqo Taabotey
de7ees. He caaqo Taabotiyann mannay de7iya
worqa xaaroy, aacida Aaronaa xam7aynne
Muse higgey xaafetida nam7u loche shuchati
de7oosona.

⁵ He Taabotiyape bolla baggara atatetha
kamaa banta qefiyan genthiya boncho kiruubeti
de7oosona. Shin ha77i he ubbaa qoncisidi
odanaw danda7oko.

⁶ Ha ubbay haysada giigidaape guye, kahineti
ubba wode banta oosuwa oothanaw dukaaniyas
koyro kifiliya geloosona.

9:2 Kessa 26:1-30; 25:31-40. **9:3** Kessa 26:31-33. **9:4** Kessa
30:1-6; 25:10-16; 16:33; Taybo 17:8-10; Kessa 25:16; Zaare 10:3-5.

9:5 Kessa 25:18-22. **9:6** Taybo 18:2-6.

⁷ Shin kahine halaqaa xalaali dunkaaniiyas nam7antho kifiliya laythafe issi toho gelee. I yaa gelishe ba nagaraa gishonne asay eronna oothida nagaraa gisho suutha yarsho ekonna gelenna.

⁸ Koyro dunkaaney eqidi de7ishin, Ubbaafe Geeshsha Bessaa efiya ogey buroo dooyetiboon-aysa Geeshsha Ayyaanay hessan erisees.

⁹ Hessi ha wodiyas leemiso; Xoossas imetiya imoyenne yarshoy goyinniya uraa kaha geeshshanaw danda7onaysa haysi bessees.

¹⁰ Hessati muussaba, ushshabanne dumma dumma meecha wogata odeyisata. Enti ooratha wogay yaana gakanaw oosetiya kare bagga wogata.

¹¹ Shin Kiristoosi ha77i nu demmida lo77obatas kahine halaqa gididi yis. I gelida dunkaaney gitanne polo gididaysa. He dunkaaney asa kushen oosetibeenna qassi ha alamiyaba gidenna.

¹² Kiristoosi Ubbaafe Geeshsha Bessaa geliya wode deesha suuthinne mari suuthi ekidi gelibeenna. Shin merinaa atatetha immanaw ba suuthaa ekidi zaarethonna ogen issi toho gelis.

¹³ Deesha suuthayenne korma suuthay, xuugetida ussa bidoy, tunida asaa bolla dharcetidi entana geeshshiyaba gidiko,

¹⁴ merinaa Geeshsha Ayyaana baggara borey bayna yarsho oothidi, Xoossaas bana immida Kiristoosa suuthay, de7o Xoossaa goyinnana mela hayqo kaaletiyya oosuwape nu kaha waati aathidi geeshshennee?

¹⁵ Hessa gisho, xeegetidaysati Xoossay immida merinaa laata ekan mela Kiristoosi ooratha caaquwas giddo gididi sigetheysa gidis. Hessi haniday asay koyro caaquwape garsan de7iya wode oothida nagaraape entana wozanaw I hayqidaysana.

¹⁶ Hiza, keekey de7iko, he keekida uraa hayqoy eretanaw koshshees.

¹⁷ Keekida uray hayqiko iya keekey minnees. Keekida uray hayqonna attiko iya keekey oothenna.

¹⁸ Hari attoshin, koyro caaqoyka suuthi bayna minnibeenna.

¹⁹ Musey higge kiita ubbaa asaas odidaape guye mara suuthinne deesha suuthi haathara walakidi, zo7o dorsa ikisenne hisoophe wurco ekidi, max-aafaa bollanne asaa bolla wurxis.

²⁰ Musey asaako, “Hinte naagana mela Xoossay kiitida suutha caaqoy haysa” yaagis.

²¹ Hessadaka, dunkaaniya bollanne oothiya mi-ishe ubbaa bolla suuthaa wurxis.

²² Tumaka higgey geysada guuthabatape attishin, ubbabay suuthan geeyees. Suuthi gukon-nashin atotethi baawa.

Yesuusi Polo Yarshetis

²³ Saluwabaas leemiso gididaysati ubbay mehe yarshon geeyanaw koshshees. Shin salobati banta huuphen hessafe aadhiya yarshuwan geeyanaw koshshees.

²⁴ Kiristoosi tuma Xoossa keethaas leemiso gidida, asa kushen oosetida Ubbaafe Geeshsha

Bessaa gelibeenna. Shin I ha77i nu gisho, Xoossaa sinthan bentanaw saluwa gelis.

²⁵ Kahine halaqay laythan laythan ba suuthi gidonnaysa ekidi, Ubbaafe Geeshsha Bessa geles. Shin Kiristoosi daro toho bana yarshanaw salo gelibeenna.

²⁶ Hessada hanidaba gidiyako, Kiristoosi alamey medhetoosape doomidi daro toho waayetanaw koshshees. Shin ha77i wodiya wursethan nagara digganaw bana yarshidi zaarethonna ogen issi toho bentis.

²⁷ Asi ubbay issi toho hayqanaw hessafe guye pirdetanaw bessees.

²⁸ Hessadaka, Kiristoosi daro asaa nagara digganaw issi toho yarshetis. Shin I nagara tookanaw gidonashin, bana naageysata ashshanaw nam7antho qoncana.

10

¹ Muse higgey yaanaw de7iya lo77obatas kuyape attishin, ba huuphen waanna gidenna. Hessa gisho, laythan laythan pacey bayna yarshetiya yarshoy goyinnanaw shiiqiya asaa polo oothanaw danda7enna.

² Higgey enta polo oothanaw danda7idaba gidiyako enti yarsho yarsheysa agganashin. Qassi goyinnanaw shiiqiya asay banta nagaraape geeyana; enta kahayka entana bala gidi mootenna.

³ Shin he yarshoti laythan laythan nagara qofisoosona.

⁴ Ayis giiko, korma suuthinne deesha suuthi nagara digganaw danda7enna.

⁵ Hessa gisho, Kiristoosi ha alamiya yida wode haysada yaagis:

“Neeni yarshonne imo koyabaaka;
shin taw asho giigisadasa.

⁶ Neeni xuussa yarshoninne
nagara yarshon ufaytabaaka.

⁷ He wode, ‘Ta gisho maxaafan xaafetidaysada,
Godaw, taani ne sheniya oothanaw yas’ yaa-
gas”
yaagis.

⁸ Yarshoy yarshetana mela higgey kiittiyaba gidikoka, Kiristoosi koyro, “Neeni yarshonne imo, xuussa yarshonne nagara yarsho koyabaaka; entan ufaytabaaka” yaagis.

⁹ Kaallidika I, “Godaw, Heko taani ne sheniya oothanaw yas” yaagis. Hessa gisho, Kiristoosi nam7anthuwa essanaw koyroysa shaaris.

¹⁰ Yesuus Kiristoosi Xoossaa sheniya oothidi, zaarethonna ogen issi toho ba ashuwa yarshida gisho nuuni geeyida.

¹¹ Kahine ubbay, nagara digganaw danda7onna he yarshota gallas gallas yarshishe eqidi ba oosuwa oothees.

¹² Shin Kiristoosi ubba wodes gidiya issi nagara yarshuwa yarshidi, Xoossaafe ushacha baggan uttis.

¹³ He wodiyape doomidi iya morketi iya tohoy yedhiyabaa oothana gakanaw naagees.

¹⁴ I zaarethonna ogen issi toho bana yarshida yarshuwan geeshshata merinaw polo oothis.

¹⁵ Qassi Geeshsha Ayyaanay nuus haysa marka-tees. Koyro haysada yaagis:

¹⁶ “He gallasatape guye,
taani entara caaqiya caaqoy haysa:
Taani ta higgsiya enta qofan wothana;
enta wozanan xaafana”
yaagees.

¹⁷ Kaallidika,
“Taani enta nagaraanne
enta iita oosuwa zaara qopike”
yaagees.

¹⁸ Hiza, nagari atto geetetidaape guye nagaras yarshetiya yarsho koshshenna.

Ane Xoossako Shiiqoos

¹⁹ Hiza, ta ishato, nuuni Yesuusa suuthaa baggara Ubbaafe Geeshsha Bessaa gelanaw nuus minotethi de7ees.

²⁰ Nu gelanay Kiristoosi ba magarajuwa, hes-sika ba ashuwa baggara nuus dooyida oorathinne de7o gidida ogiyana.

²¹ Nuus Xoossa Keetha bolla shuumetida gita kahine halaqay de7ees.

²² Nuuni iita kahape geeyanaw nu wozanaa wurxetidi, nu asatethaa xillo haathan meecetidi, suure wozananinne polo ammanon Xoossaako shiiqoos.

²³ Nuus ufaysa qaala immida Xoossay amanetidaysa gidiya gisho nu markatiya ufaysaa ushachi haddirsi goonna minthidi oykoos.

24 Issoy issuwa siiqosinne lo77o oosos waati denthethaneko ane qopoos.

25 Issoti issoti meeze oothidi shiiqeysa aggidaysada nuuni issife shiiqeysa aggoko. Shin Godaa gallasay matatidaysa hinte be7iya gisho hessa kaseysafe aathidi oothite.

26 Nuuni tuma eratethaa ekidaape guye erishe nagara oothiko, hizape nu nagaraa gisho yashetana yarshoy baawa.

27 Shin hiza attiday yashshiya pirdaanne Xoossaa morketa xuugganaw giigida wolqaama tama.

28 Muse higgsiya kiitetonna ixida oonika nam7u woyko heedzu asi iya bolla markatiko qadhey baynashin hayqees.

29 Yaatin, Xoossaa Na7aa kadhida uray, bana geeshshida Xoossaa caaqo suuthaa tunabaada qopida uray, qassi aadho keehatetha Ayyaana cayida uray, ay mela iita pirdaa ekanaw bessiyako ane qopite.

30 Hiza, “Halo kesoy tabaa, ta kushe zaarana” gadaysa nu eroos. Qassika, “Goday ba asa pirdana” yaagis.

31 De7o Xoossaa kushen kundethi daro yashshees.

32 Hintew Xoossaa poo7oy poo7idaape guye hinte daro waayen, gita baaxen gencida beni wodiya qopite.

33 Issi issi toho hinte asa sinthan cayetideta; goodetideta; issi issi toho hessa mela waayey gakida asaara issife waayideta.

³⁴ Qashon de7iya asaaska qadhetideta. Hintew lo77onne dhayonna shaloy salon de7eysa hinte erida gisho hinte shaloy bonqetiya wode ufaysan danda7ideta.

³⁵ Hessa gisho, gita woytoy de7iya hinte minotethaa yeggofite.

³⁶ Xoossaa sheniya polidi, I hintew immana gida ufaysaa ekana gakanaw gencanaw koshshees.

³⁷ Hiza, Geeshsha Maxaafan,
“I, yaana gidaysi yaana; gam7enna.

³⁸ Shin ta xilloy, tanan ammanetidi daana;
oonika guye simmiko tana ufaysenna”
yaagees.

³⁹ Nuuni ammanidi attiya asaa baggafe attishin,
guye simmidi dhayiya asaa bagga gidoko.

11

Ammano

¹ Ammano guussay, demmana gidi ufaysan ammanetidi naagiyabanne nu be7onnaba be7iyada oothidi ekiyaba.

² Beni aawati ammanon Xoossaafe markatethi ekidosona.

³ Alamey Xoossaa qaalan medhetidaysa nu ammanon eroos. Qassi bentiyabay bentonnabape medhetis.

⁴ Aabeli Qaayelape aadhiya yarsho Xoossaas yarshiday ammanonna. Xoossay Aabela imuwa ufaytidi ekida wode I xillo gididaysa markatis. Aabeli hari attoshin, hayqidika ba ammanuwan ha77i gakanaw odees.

⁵ Heenokey hayqonna salo biday ammanonna. Xoossay iya ekida gisho oonika iya be7anaw danda7ibeenna. Heenokey salo eketanaape sinthe I Xoossaa ufaysida asi gideysi odetis.

⁶ Ammanoy bayna oonika Xoossaa ufaysanaw danda7enna. Xoossaako yaa oonika Xoossay de7eysanne bana koyeysatas woyto immeysa ammananaw koshshees.

⁷ Nohey buroo bentonnabas Xoossi iyaw odida wode Xoossas yayidi, bananne ba soo asaa ashshanaw ammanon markabe keexis. Yaatidi ba ammanuwan alame pirdidi, ammanon bentiya xillotethi Xoossafe ekis.

⁸ Abrahaamey laata oothidi ekana biitta baana mela Xoossay iya xeeqida wode hari attoshin, I aw biyako eronna ixikoka kiitetiday ammanonna.

⁹ Abrahaamey Xoossay iyaw immana gida biittan bete asada de7iday ammanonna. Xoossay he immana gidaysa iyara issife laattanaw de7iya Yisaaqaranne Yayqoobara wolla dunkaannen de7is.

¹⁰ I, Xoossay qopidi keexida xaala baasoy de7iya katamaa naagees.

¹¹ Saara ba huuphen cimidabaa gidikoka ufaysi immida Xoossay ammanetidaysa gideysa erida gisho qanthatanaw wolqa demmiday ammanonna.

¹² Hessa gisho, hayqida asi daaniya issi addiyafe salo xoolinto melanne abba gaxan de7iya tayboy bayna shafe mela zerethi yeletidosona.

¹³ He asa ubbay bantaw geetetida ufaysaa qaala ekonna ammanon hayqidosona. Shin haahora hessa be7idi, demmidaada oothidi, ufaysan ekidosona. Qassi enti sa7an imathenne bete asi gideysa eridosona.

¹⁴ Hessada giya asay banta biitta naageysa qoncen bessees.

¹⁵ Enti he aggidi keyida biitta guye qopidaba gidiyako guye simmanaw danda7oosona.

¹⁶ Shin ha77i aadhidi lo77iya salo biitta laamotosona. Hessa gisho, Xoossay entaw katama giigisida gisho, “Enta Xoossaa” geetetidi xeegetanaw yeellatenna.

¹⁷ Abrahaamey paacetida wode Yisaaqa yarshiday ammanonna. He ufaysa qaala ekida Abrahaamey ba issi na7aa yarshanaw giigis.

¹⁸ Xoossay Abrahaameko, “Ne kochay Yisaaqa baggara xeegetana” yaagidi odis.

¹⁹ Xoossay hayqope denthanaw danda7eysa Abrahaamey ammanida gisho, Yisaaqa hayqope paxi dendidaada oothidi zaari ekis.

²⁰ Yisaaqi wodepe hananaba eridi Yayqoobanne Eesawe anjiday ammanonna.

²¹ Yayqoobi hayqana hanishe, issi issi Yoosefa nayta anjidayenne guufe bolla katidi goyinniday ammanonna.

²² Yoosefi hayqanaw matida wode Isra7eele asay Gibxefe keyanaysa odidayenne ba meqethaa oothanaba enta kiittiday ammanonna.

11:13 Medhe 23:4; 1 Taari 29:15; Maz 39:12. **11:17** Medhe 22:1-14. **11:18** Medhe 21:12. **11:20** Medhe 27:27-29, 39-40. **11:21** Medhe 47:3; 48:1-20. **11:22** Medhe 50:24-25; Kessa 13:19.

²³ Musey yeletidaape guye iya aayanne iya aaway mala lo77o na7a gididaysa be7idi heedzu ageena qottiday ammanonna; enti kawa awaa-juwa babibookona.

²⁴ Musey diccidaape guye Gibxe kawa na7e na7a geetetanaysa ixiday ammanonna.

²⁵ Musey nagaran guutha wodes ufaytanaape, Xoossaa asaara waaye ekanaysa dooris.

²⁶ I wodepe demmana woytuwa tishshi ooth-idi xeellida gisho, Gibxe shaluwape aathidi Kirs-toosa gisho boretanaysi daro aadhiya duretethi gididaysa eris.

²⁷ Musey Kawa hanquwa yayyonna, Gibxefe keyday ammanonna. Bentonna Xoossaa be7ida asada hanidi ba qofan gencis.

²⁸ Hayqo ehiya kiitanchoy Isra7eele asaa bayra nayta wodhonna mela Musey Paasikanne suutha wurxetha wogaa oothiday ammanonna.

²⁹ Isra7eele asay mela biittara hemetiyada hemetidi, Zo7o Abbaa pinniday ammanonna. Shin Gibxe asay gelanaw paacidi be7iya wode haathay enta mittis.

³⁰ Isra7eele asay Iyaarko katamaa shucha dirsaa laapun gallas yuuyidi, kundisiday ammanonna.

³¹ Laymiya Ra7aaba biitta wocheyisata mokida gisho, kiitetonna asaara hayqonna attiday ammanonna.

³² Hiza, haraa ta ay go? Gediyoona, Baaraqaba, Samsoonaba, Yoftaaheba, Dawitaba,

Sameelaba, qassi nabetaba odanaw taw wodey gidenna.

³³ Enti ammanon kawotethata xoonidosona; xillotethan aysidosona; Xoossay immana gida ufaysaa ekidosona; gaammota doona gordidosona;

³⁴ tama wolqaa toysidosona; morketa mashshafe attidosona; banta daaburan minnidosona; olan wolqaama gididosona; allaga toora goodidosona.

³⁵ Maccasati banta hayqidaysata hayqope paxin ekidosona.

Qassi harati aadhiya hayqope dendo ekanaw koyidi qashope biletanaysa ixidosona.

³⁶ Harati asan boretidi lisson garaafetidosona; harati santhalaatan qashetidi qasho keethan yegetidosona.

³⁷ Enti shuchan cadetidosona; magaazen nam7a keyidi phalqetidosona; paacetidosona; mashshan hayqididosona; entaw ubbabay dhayin metootidosona. Dorsa itenne deesha ite ma7idi yuuyidosona.

³⁸ Entaw ha alamey giigonna ixin mela biitan, dere bolla, gongoloninne olla giddon yuuyidosona.

³⁹ Xoossay enta ammanuwaba markatikoka, he ubbay geetetida ufaysa qaala ekibookona.

⁴⁰ Xoossay nuus lo77oba qopi wothida gisho enti nuuni bayna polo gidokona.

11:32 Ayse 6:11–8:32; 4:6–5:31; 13:2-16; 11:1-12; 1 Same 16:1; 1 Kawo 2:11; 1 Same 1:1-25. **11:33** Daane 6:1-27. **11:34** Daane 3:1-30. **11:35** 1 Kawo 17:17-24; 2 Kawo 4:25-37. **11:36** 1 Kawo 22:26-27; 2 Taari 18:25-26; Ermi 20:2; 37:15; 38:6. **11:37** 2 Taari 24:21.

12

Xoossay Nuus Aawa

¹ Hiza, shaarada nu yuushuwan darida haysa mela markati nu matan de7iya gisho nuna dhu-biya ubbaanne oykidi haariya nagaraa diggidi, nu sinthan de7iya gaadde wothaa gencan woxoos.

² Nu ammanuwas oge dooydaysanne nu wursetha poluwako nuna gathiya Yesuusa bolla nu ayfiya wothoos. Yesuusi wodepe de7iya ufaysaa gisho masqaliya waayiya danda7idi, yeella hayquwa kadhidi, Xoossaafe ushacha baggan uttis.

³ Hiza, hinte doccidi ufaysi qanxonna mela nagaranchota ixuwa danda7ida Yesuusa qopite.

⁴ Nagarara de7iya baaxiyan buroo suuthu gus-sana gakanaw eqetibeketa.

⁵ Xoossay ba qaalan, ba naytada hintena zori-daysa dogideta.

“Ta na7aw, Xoossaa seera leqofa;

I nena seeriya wode ufaysi qanxofa.

⁶ Goday ba dosiya uraa seerees;

qassi ba na7ada ekiya ubba garaafes”
yaagees.

⁷ Xoossay hintena ba naytada seeriya wode gencite; Aaway seeronna na7i oonee?

⁸ Xoossay ba nayta ubbaa seerees; hinte seeret-tonna ixiko tuma iya nayta gidonashin balako nayta.

⁹ Qassi nuna yelida nu aawati nuna seerosona; nuka entana bonchoos. Yaatin, nuuni nu ayyaana Aawas waanidi aathidi haaretoko?

¹⁰ Hiza, nu aawati bantaw lo77o daanida mela guutha wodes nuna seeridosona. Shin Xoossay nu go77as, nu iya geeshshatethan shaaketana mela seerees.

¹¹ Nuuni seeretiya wode yiloyeesipe attishin, ufaysenna. Shin guyepe seeretethi meezetida asaas seeray, saroy kumida xillotethaa ayfe ayfisees.

Zorenne Naagiso

¹² Hiza, hinte argaacida qesiyanne hinte daaburida gulbata minthite.

¹³ Wobbey paxana melape attishin, aathidi meqonna mela hinte tohuwas suure oge giigisite.

¹⁴ Asa ubbaara saro daanawunne geeshshatethan daanaw minnite; geeshshatethi bayna oonika Godaa be7anaw danda7enna.

¹⁵ Hintefe oodeska Xoossaa aadho keehatethay paconnaada, qassi camo ayfe ayfidi daro asaa tunisiyanne dhaysiya zerethada gidonna mela naagetite.

¹⁶ Hinte giddon laymatiya asi woyko issi toho miya kathas ba bayratetha toochidi bayzida Eesawe mela asi doonna mela naagetite.

¹⁷ Guyepe Eesawey he anjuwa ekanaw koyida wode digetidaysa ereeta. I he anjuwa afuthan minnidi koykoka, demmanaw danda7ibeenna; I nagaraape simmanaw qaada demmibeenna.

¹⁸ Hinte kushen boshetiya Siina deriyako, eexiya tamaako, dhumaako, caaganaako, gotiyaako,

19 moyze punuko woyko qaalay si7etiya bessaako yibeeketa. He qaala si7ida asay hara guzha qaala si7onna mela woossidosona.

20 Ayis giiko, “Hari attoshin, do7i he zumaa bochiko, shuchan cadetidi hayqo” yaagida kiitaa enti tookanaw danda7ibookona.

21 He haniyabay daro daganthiyaba gidida gisho Museyka, “Taani yashshan kokoras” yaagis.

22 Shin hinte Xiyoone zumako, de7o Xoos-say de7iya Yerusalaame katamaako, issife shi-igidi ufaytiya daro mukulu kiitanchotako saluwa yideta.

23 Enta sunthay salon xaafetida woosa keethaa bayra naytako, asa ubbaa dayna gidida Xoos-saako, polo gidida xillo asaa ayyaanatako yideta.

24 Ooratha caaquwas giddo gididi sigethiya Yesuusako, Aabela suuthaafe aadhiyaba odiya wurxetida suuthako yideta.

25 Hintew odiya ura qaala ixas goonna mela naagetite. Kaseysati sa7an gididi odida kiita si7onna ixidi, kessi ekiboonnaba gidiko, yaatin, salon gididi odiya qaala nuuni ixas giiko waanidi kessi ekanee?

26 He wode iya qaalay sa7a qaathis. Shin ha77i taani, “Sa7a xalaala gidonashin, issi toho zaarada saluwaka qaathana” yaagis.

27 “Issi toho zaarada” giya qaalay qaaxonnabay minnidi daanaysa, qassi qaaxiya medhetidabati dhayanaysa bessees.

²⁸ Nuuni qaaxanaw danda7onna kawotethaa ekiya gisho Xoossaa galatoos; Xoossaa ufaysiya ogen bonchoninne yashshatethan iya goyinnoos.

²⁹ Hiza, nu Xoossay tuma xuuggiya tama.

13

Wursetha Zore

¹ Ammaniya asada issoy issuwara polo siiqetite.

² Imathe mokeysa dogopite. Issi issi asati hes-sada oothishe eronna kiitanchota mokidosona.

³ Qashon de7eyisata hinteka entara issife qashon de7iyada oothidi entana qopite. Waaye ekiya asaara issife hinteka waaye ekiyada oothidi entana qopite.

⁴ Ekoyenne gelay asa ubbaa matan bonchetidaba gido. Qassi Xoossay laymateysatanne laammeyisata pirdanaw de7iya gisho azinayenne machiya issoy issuwas ammanetanaw bessees.

⁵ Miishe siiqope hintena naagite; hintew de7iyaban alite. Xoossay, “Taani nena ubbaraka yeggike woyko aggike” yaagis.

⁶ Hessa gisho, nuuni ammanetidi,
“Goday tana maaddeysa;
ta yayyike; asi tana ay oothanee?”
yaagos.

⁷ Xoossaa qaala koyro hintew odida hintena kaaletheyisata qopite. Enti waanidi de7idaako enta duussaa be7idi enta ammanuwa kaallite.

⁸ Yesuus Kiristoosi zineka hachika merinawuka laametenna.

⁹ Dumma dumma ooratha timirten haraso bidi dhayopite; boopite. Nu wozanay Xoossaa aadho keehatethan minnanaw besseesipe attishin, min go77onna kathan wogaa polon gidopo.

¹⁰ Shin dunkaaniya giddon oothiya kahineti he yarsho kathaafe maanaw entaw maati bayna yarsho bessay nuus de7ees.

¹¹ Kahine halaqay nagara yarshos mehe suuthi ekidi yarshanaw Ubbaafe Geeshsha Bessaa gelees. Shin he mehiya ashuwa dirsaafe karen xuuggees.

¹² Hessadaka, Yesuusi deriya nagaraape ba suuthan geeshshanaw katamaa pengiyafe karen waayetis.

¹³ Hiza, nuuni boriya tookidi dirsaafe kare iyako keyoos.

¹⁴ Hiza, nuus haysan merinaw de7iya katami baawa, shin nuuni yaana katamaa naagoos.

¹⁵ Hiza, Yesuusa baggara ubba wode iya sunthaas markatiya mettersha galata yarsho Xoossaa immoos.

¹⁶ Lo77oba oosonne hintew de7iyabaape metootida asaas imo dogopite. Hiza, hessa mela yarshoy Xoossaa ufaysees.

¹⁷ Hintena kaaletheysatas kiitetite; enti giyaba oothite. Enti banta oothiyabas Xoossaa sinthan oyshetanaw de7iya gisho, hintena heemmoosona. Hinte entaw kiitetiko, banta oosuwa ufaytidi oothana; hessi hanonna ixiko, enti azzanishe oothana; hessi hintena aybibaaka maaddenna.

¹⁸ Nuus Xoossaa woossite. Nu kahay geeshshi; nu ubba wode lo77oba oothanaw koyoos.

¹⁹ Taani hinteko ellesada yaana mela hinte taw minthidi Xoossaa woossana mela ta hintena hadara gayis.

²⁰ Sarotethaa Xoossay, dorsa heemmiya nu Godaa Yesuusa, ba merinaa caaqo suuthan hayqope denthidaysi,

²¹ iya sheniya oothana mela lo77oba ubban I hintena danciso. Iya ufaysiyabaa Yesuus Kiristoosa baggara nunan Xoossay ootho. Yesuus Kiristoosa baggara Xoossaas merinaape merinaa gakanaw bonchoy gido. Amin7i.

²² Ta ishato, ta ha dabdaabiya hintew qanthan xaafida gisho, hinte ta zoriya saletonna ekana mela ta hintena woossayis.

²³ Nu ishay, Ximotiyoosi qashope biletidaysa erite. I ellesidi taako yiiko ta iyara hintena bada be7ana.

²⁴ Hintena kaaletheysatanne ammaniya ubbaa saro giite. Xaalepe yida ammaniya asay hintena saro yaagosona.

²⁵ Xoossaa aadho keehatethay hinte ubbaara gido. Amin7i.

Geeshsha Maxaafa
Gofa: Geeshsha Maxaafa (Bible) for Ethiopia, Latin
script

copyright © 2024 The Word for the World International

Language: Goofa (Gofa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

cd247997-ca42-596b-9d91-94ffba4675ef